

PROCEZ VERBAL

D V

## MIRACLE

TRES-VERITABLE

ARRIVÉ A SAUMUR LE  
neufiesme iour de Septem-  
bre mil six cens vingt.

*En la personne d'une femme paralytique de la  
Ville d'Orleans : qui a receu parfaite gueri-  
son, apres s'estre confessée & auoir receu la S.  
Cōmunion, en la Chapelle de Nostre Dame des  
Ardilliers, suivant le vœu qu'elle en auoit fait.*



A PARIS,

Iouste la copie imprimée à Saumur,  
Chez DENYS LANGLOIS,  
au mont S. Hilaire à l'en-  
seigne du Pelican.

M. D. XX.

241

Case

F


39

326

1620 pnd

THE NEWBERRY  
LIBRARY





AN de grace mil six cens vingt le  
neufiesme iour de Septembre: Par  
deuant nous Ieā Bonneau Escuier  
sieur de la Maison neufue, Con-  
seiller du Roy nostre sire, Senes-  
chal, Lieutenant General, & Iuge ordinaire en la  
Seneschaussée, ville & ressort de Saumur. Ont  
comparu Reuerends Peres Bonaventure Drouin  
& Pierre Magueux Prestres de la Congregation  
de l'Oratoire, establie en la Chapelle de la Fon-  
taine de nostre Dame des Ardilliers pres cette vil-  
le. Lesquels en presence du Procureur du Roy, &  
de Iean Vignier commis de nostre greffier: Nous  
ont dit & rapporté auoir ce iourd'huy appris qu'  
vne femme de la ville d'Orleans, qu'ils ont ouy  
dire auoir nom François Mandrian, malade d'une  
paralytie, laquelle ne s'aidoit des cuisses, iambes,  
ny bras depuis plus d'un an, estoit arriuée en ceste  
ville le iour de lundy dernier, pour faire ses deu-  
otions & prieres dans ladite chapelle où elle auroit  
communié le iour d'hier feste de la Natiuité no-  
stre Dame, & ce iourd'huy receu guerison, che-  
minoit librement, & s'aidoit des bras comme au-  
parauant ladite maladie, ainsi que leurs ont dit  
plusieurs personnes qui sont venuës de cōpagnie  
auecque ladite femme de ladite ville d'Orleans  
à ladite chapelle, & auoir veu ce iourd'huy ma-  
tin ladite femme cheminer seule sans annilles, ny  
ayde d'aucune personne dans ladite chapelle, où  
elle seroit allée pour remercier Dieu de la guerison.

son qui luy a pleu luy donner par l'intercession des prieres de la S. Vierge: Nous requerant vouloir informer de la verité de ce que dessus pour la gloire de Dieu, dont leur aions decerné acte, & ordonné qu'à la requeste du Procureur du Roy, rât ladite femme, que ceux qui sont venus avecq elle de ladite ville d'Orleans, & autres qui ont cognoissance de ladite maladie & miracle, soyent appelez par deuant nous, pour estre par nous ouis sur la verité de ce que dessus. Donné & faict au dict Saumur par deuant nous Seneschal susdit le dit iour & an, signé Bonneau, Godin, Drouin, P. Magueux, & I. Vigner commis Greffier.

**F**Rançoise Mandram femme de Jacques Lasse-  
ray, quinquaillieur demeurât en la ville d'Or-  
leans, paroisse S. Catherine, laquelle serment fait  
nous a dict qu'il y a enuiron de vingt-vn mois à  
l'issue d'une fièvre couche il luy print vne mala-  
die que plusieurs appellent Paralytie: depuis le-  
quel temps elle a tousiours esté tellemēt incom-  
modée de ses cuisses, iambes, & bras, qu'elle ne  
pouuoit cheminer: & la falloit porter par tout où  
elle vouloit, sinon qu'elle se portoit avec des an-  
nilles, avec fort grand peine, quelque peu par la  
chambre, & sentoit de grâdes froidures aux iâbes,  
& bras: que pendant sa maladie, & par le tēps de  
quatre à cinq mois, elle auroit esté veuë, & trai-  
ctée par plusieurs Medécins & Chirurgiens de la-  
dite ville d'Orleans, sans auoir trouué aucun alle-  
gement à son mal: Que le iour de Vendredy der-  
nier elle seroit partie de la ville d'Orleans, avec  
plusieurs de ses voisins dedans le batteau d'Esti-  
enne Dudoy, & André Bretin voituriers par eauë,  
pour venir faire ses deuotions à la chapelle de no-



stre Dame des Ardilliers, où elle auoit faict vœu de  
 venir prier la S. Vierge d'interceder pour elle par  
 ses prieres, afin de receuoir guérison : qu'elle se-  
 roit arriuée dedans ledit batteau près ladite Cha-  
 pelle le iour de Lundy dernier sur les neuf à dix  
 heures de la matinée. Que le iour d'hier iour de  
 la Natiuité nostre Dame, elle se fist porter en  
 vne chaire par lesdits Dudoy & Bretin dedans la-  
 dite Chappelle, où elle fit ses deuotions & prie-  
 res à Dieu, & à la S. Vierge, se confessa & com-  
 munia, & sur les sept heures du soir se retira en  
 la maison de Pierre Caillard sise en Fenet, proche  
 de ladite chapelle. Que la nuit dernière dormât  
 il luy auroit semblé auoir entendu vne voix qui  
 luy disoit, Tu es guérie, va à pied, redre graces à la  
 Vierge. Et à mesme temps se seroit éueillée, & au-  
 roit senty vn allegement de mal, avec vne grande  
 ioye en elle mesme, & quelque temps apres se se-  
 roit leuée pour veoir si elle pourroit marcher sans  
 ayde : & voyant qu'elle cheminoit seule, se seroit  
 habillée : & ce faict allee sans ayde d'aucune per-  
 sonne de sondit logis à ladite chapelle, rendre  
 graces à Dieu de sa guérison, & de ladite chapelle,  
 en cete nostre maison sans ayde d'aucune person-  
 ne, & à present se porte fort bien, & chemine aus-  
 si librement qu'elle fist iamais. Dequoy elle re-  
 mercie Dieu & la sainte Vierge. Dont luy auons  
 decerné acte : & à elle enioinct de nous enuoyer  
 certificat de sa maladie, tant des Medecins, Apo-  
 riquaires & Chirurgiens qui l'ont traictée en sa  
 maladie, Curé de sa paroisse, que quelques cinq  
 ou sept notables personnes de ladicte ville d'Or-  
 leans, ses voisins, dedans d'huy en vn mois. Ce  
 quelle a promis faire, & sermēt reiteré a dit tout  
 ce que dessus contenir verité.

**M**ARIE Lasseray fille d'Estienne Lasseray Bourgeois d'Orleans y demeurante, paroisse S. Paterne, Gillette Daby veufue François Braugay, demeurante audit Orleans paroisse de nostre Dame de Recourance, Michelle de la Haye femme de Mathieu Mathé, Mercier, Marie Vincent, femme de André Bretin voiturier par eauë, François Rabot, femme de Estienne Dudoy voiturier par eauë, Elie le Grand, veufue Abel Belaisme, Marie Michon fille Jacques Michon demeurant audit Orleans, paroisse nostre Dame de Recourance, lesquelles serment faiët en presence dudit Vigner : Nous ont dit estre aagees sçauoir ladite Lasseray de 34. ans ou enuiron, Daby de 52. ans ou enuiron, Delahaye de 42. ans ou enuiron, Vincent de vingt ans ou enuiron. Rabot de vingt deux ans ou enuiron : Le grand de 38. ans ou enuiron, & ladite Michon de 17. ans ou enuiron : Et icelles enquisés sur la cognoissance de ladite Mandran, & cognoissance qu'elles ont de sa maladie. Nous ont vnanimemēt dit biē cognoistre ladite Mandran femme dudit Lasseray demourant audit lieu d'Orleans, de laquelle elles sont proches voisines, & particulièrement ladite Lasseray estre belle sœur de ladite Mandran : Et toutes ensemble nous ont concordablement dict bien sçauoir qu'il y a vingt mois, & plus que ladite Mandran à l'issuë d'une sienne couche, seroit tombée en vne maladie telle & si grande, qu'elle ne s'aidoit des iambes & bras, & fut quelque cinq mois traictée des Medecins & Chirurgiens de ladite ville d'Orleans, apres lequel traictement voyant qu'elle ne receuoit allegemēt de ses douleurs, elle print des annilles avecque lesquelles elle se portoit avecque grand peine quelque peu par la chambre, & lors que ladite Mandran vou-



loit aller à l'Eglise il la falloir porter dedans vne chaire : Que le iour de vendredy dernier , elles partirēt toutes ensemble de ladite ville d'Orleās, & se mirent dedans le batteau desdits Dudoy & Bretin, pour venir faire leurs voyages & deuotiōs à la Chapelle de nostre Dame des Ardilliers, & arriuerent au lieu de Fenet , proche de ladite Chapelle, le iour de lundy dernier, sur les neuf à dix heures du matin, dedans laquelle chapelle des Ardilliers ladite Mandran fut portée par dessous les bras par lesdicts Dudoy & Bretin: & apres auoir faict sa priere, fut par eux portée dedās vne chaire, iusques à vn logis proche de ladite chapelle: Que le iour d'hier ladite mandran fit ses deuotiōs, se confessa, & communia : Et ce iourd'huy matin ont veu ladite Mandran cheminer seule , sans ayde d'aucune personne , & sans aucunes annilles, ou bequilles, & l'ont veu aller de son pied depuis le logis où elle a couché, iusques dedās ladite chapelle, & de ladite chapelle en ceste nostre maison sans ayde d'aucune personne : Et à present ladite Mandran chemine fort bien , & n'a aucun tremblement de corps comme elle auoit auparauant ce iour, & est ce qu'elles ont dict deuēment enquisēs, & ont declaré ne sçauoir signer, & a ladite Mandran, signé François Mandran, femme de Iacque Lasseray.

**E**STIENNE Dudoy, voiturier par eau de demeurant audit lieu d'Orleans, parroisse de nostre Dame de Recourance, aagé de 26.ans, ou environ, depose serment faict, bien cognoistre ladite Mandran, femme de Iacques Lasseray, marchant demeurāt audit lieu d'Orleans: Que le iour de Vendredy dernier, ladite Mandran avec autres femmes, & filles d'Orleans, entrerent en son bat-

eau pour les amener à la chapelle des Ardilliers de cete ville, en voyage: & que lors que ladite Mandran arriua au batteau, & ledit Bretin, la porterent entre leurs bras, depuis le bord de la terre iusques dedans leur batteau, d'autant que ladite Mandran ne s'aidoit du corps: & le mesme iour arriuerent au lieu de S. Dyé, où elle fut par luy, & ledit Bretin portée dās vne chaire depuis leur batteau iusques à l'hostellerie, & le lendemain arriuerēt à la ville d'Amboise où elle fut par luy depofant, & ledit Bretin pareillement portée dedans vne chaire à l'hostellerie, & la reporterent d'une mesme facon au batteau: Que le iour de lundy dernier, ils arriuerent en ceste ville, & la porterent dedans ladite chapelle, & de ladite chapelle alla avec des annilles au logis où elle est logée, proche de ladite chapelle, dedans laquelle elle fist ses deuotions le iour d'hier, & communia, ainsi qu'il a ouy dire à ladite Mandran, & à la femme de luy depofant. Et ce iourd'huy matin a veu ladite Mandran cheminer à pied sans aide d'aucune personne, depuis le logis iusques à ladite chapelle, & depuis ladite Chapelle iusques en ceste nostre maison: Et que ladite mandran a mis ses annilles desquelles elle se seruoit pour aller quelque peu par la chambre, dedans ladite chapelle: & est ce qu'il a dict, & a signé, Estienne Dudoy.

**A**Ndré Bretin voiturier par eau, demeurant audit lieu d'Orleans, paroisse de Recourāce. Depose serment fait estre âgé de 26. ans ou environ, bien cognoistre ladite Mandran, & ledit Lasseray son mary, qui demeurent audit lieu d'Orleans, paroisse S. Catherine: Bien sçauoir des sept mois sont & plus, que ladite Mandran estoit tellement indisposée de son corps qu'elle ne pou-  
uoir



uoit s'aider des iambes, & se seruoit d'annilles, pour cheminer quelque peu par la place : Que le iour de vendredy dernier ladite Mandran avec autres femmes & filles, marchanderent avec luy, & le tesmoing precedent, pour les amener avec leur batteau en cette ville pour faire leurs deuotions à nostre Dame des Ardilliers, qu'il deposant, & le precedent tesmoing porterent de terre dedás leur batteau ladite Mandran, d'autant qu'elle ne pouuoit cheminer : Le lendemain estans arriuez à S. Dyé ils porterent dedans vne chaire ladite Mandran, depuis le basteau, iusques à l'hostellerie ; & depuis ladite hostellerie, iusques au batteau : Et arriuez en la ville d'Amboise, la porterét pareillement dedás vne chaire à l'hostellerie. **Que** le iour de lundy dernier sur l'heure de neuf à dix du matin ils arriuerent en ceste ville, proche de ladite chappelle des Ardilliers, & mirent ladite Mandran à terre, & pour ce faire la porterent le deposant & le tesmoing precedent :

Et estant arriuez sur le paué ladite Mandran print des annilles qu'elle auoit, & alla avec grand peine dedans ladite chappelle : **Que** le iour d'hier ladite Mandran feist ses deuotions, se confessa & communia dedans ladite chappelle : Et ce iourd'huy a veu ladite Mandran cheminer sans annilles, ne aide de personne, depuis le logis où elle est logée, iusques dedás ladite chappelle, & de ladite chappelle, en nostre maison, & à present chemine fort bien, & sans ayde d'aucune personne, & est-ce qu'il a dict, & ne sçauoir signer.

**P**ierre Gaillard faiseur de bagues, demeurant en Fenet fauxbourg de ceste ville, depose serment fait estre aagé de 33. ans ou environ, bien cognoistre ladite Mandran depuis le iour de lundy dernier sur les neuf à dix heures du matin, qu'elle seroit allée en sa maison avec autres femmes ou filles qui disoyent estre d'Orleans, & venues en voyage à la chappelle de nostre Dame des Ardilliers. Que ladite Mandran lors qu'elle arriua en ladite maison de luy deposant se portoit avec des annilles, & luy fut dict par quelques femmes ou filles qui estoient avec elle, qu'il y auoit quelque temps, que ladite Mandran ne s'aidoit des iambes, & ne pouuoit marcher, estoit venue expres en voyage, sur esperance de receuoir guérison, & fut ladite Mandran apportée en la maison de luy deposant, par deux homes qu'il croit estre de la ville d'Orleans, deux chaires, l'une desquelles seruoit à la porter ou elle vouloit, & l'autre pour s'asseoir dedās la chambre: Bien sçauoir que ladite Mandran fist ses deuotiõs ledit iour de lundy dedans ladite chappelle, & retourna en la maison de luy deposant sur l'heure de midy dudit iour: Que le lendemain iour & feste de la Natiuité de nostre Dame, ladite Mandran, & autres femmes & filles de sa compagnie allerent à ladite chappelle, où ils firent leurs deuotions & prieres, tant à la matinée qu'apresdisnée, & estant de retour ladite Mandran monta avec ses annilles par le degré à la haute chambre de la maison de luy deposant avec fort grand peine, ce qu'elle fist à cause que le degré est tellement estroit, qu'il n'estoit aisé de la monter dedās vne chaire. Que ce iour d'huy matin, environ la pointe ou commencement du



iour il auroit entendu vn bruit dedans la haute chambre de sa maison, & comme quelques personnes de celles qui estoient couchées, où icelles disoyent, ha! Madame vous estes donc guerrie, & quelque peu de temps apres a veu ladite Mandrā descendre sans annilles, ny ayde d'aucune personne de ladite haulte chambre, dedans la basse de la maison de luy deposant, & veu ladite Mandran cheminer seule sans annilles ne ayde de personne de ladite maison, iusques dans ladite chapelle en ceste nostre maison, & est ce qu'il a dict sçauoir deuement enquis, & ne sçauoir signer.

**E**T le 24. iour desdicts mois & an, a comparu par deuant nous Seneschal susdict, Reuerend Pere Philippes Chauffour, Prestre, Superieur des Prestres de la Congregation de l'Oratoire de Iesus, establie dans ladite chappelle des Ardilliers ee personne; lequel nous a representé le certificat à luy enuoyé par Iacques Lasseray mary de ladite Mandran, duquel la teneur s'ensuit.

**A** Viourd'huy 17. de Septembre, l'an 1620. par deuant moy Notaire Royal au Chastelet l'Orleans, & des tesmoins soubz-escrits: est venue & comparue en personne Françoise Mandrā, femme de Iacques Lasseray, marchand quincaillieur demeurant en cette ville d'Orleans, paroisse S. Catherine, fille de Marc Mandran maître Charpenrier, & Marie Macé sa femme, demurans audict Orleans, paroisse S. Laurens des Cgerils, & nostre Dame de Recourance son anex laquelle en presence dudit Lasseray son mary, qui a aussi esté de ce d'accord, a dict & de-

claré, certifié, & asseuré pour verité: Que depuis le mois de Ianuier de l'année 1619. elle auroit tousiours continuellement esté detenue en telle & si grande infirmité de maladie, qu'elle est demeurée percluse & enflée en tout son corps, sans se pouuoir ayder & porter sur ses iambes en quelque façon que ce soit, sinon que biē peu avec des bequilles, par l'aide desquelles elle se trainoit à grand peine par la chambre seulement, & à quelques iours de Dimanches elle s'efforçoit de se transporter, à l'aide d'une sienne seruante iusques à l'Eglise parochiale S. Catherine, pour ouir la sainte Messe, avec telle difficulté, & douleur, qu'elle estoit vn grand temps à y aller & venir, quoy que ladite Eglise soit fort proche de leur maison: Et si encores apres cet effort elle demeureroit vne assez long temps fort enflée, & augmētée de douleur: Laquelle maladie & perclusion luy seroit aduenue par vn violēt accouchemēt qu'elle fist audit mois de Ianuier de l'année 1619 où elle fut contraincte de se faire tirer son enfant hors du corps par les mains des Chirugiens, renouvelé par vn autre & pareil accouchement, qu'elle fist encores au derniers series de Pasques: qu'elle fut aussi accouchee par la main d'un autre Chirurgien: Depuis lesquels premier & second accouchement elle seroit tellement demeuree en telle infirmité, & perclusiō qu'elle ne se pouuoit plus transporter de lieu à autre, & n'a peu trouuer aucun remede par les mains des hommes, quelque recherche qu'elle ait faicte des Medecins, Apotiquaires & Chirugiens: si que ne luy restant plus que l'esperance en Dieu, & de rechercher sa misericorde par l'intercession de la biē heureuse Vir-



ge Mere de nostre Sauueur, elle se seroit resoluë en ce conflit, & infirmité, d'accomplir vn vœu qu'elle auoit faict d'un long tēps, à l'Eglise de nostre Dame des Ardilliers pres la ville de Saumur: & à cette fin se seroit faict porter de sa maison de cette ville, iusques au port, sur la riuiere de Loyre, où elle auroit esté mise dans vn bateau, & portee sur l'eau, iusques à l'endroi& plus proche dudit lieu des Ardilliers, & estant arriuee en iceluy lieu, elle y auroit faict ses prieres par l'espace de trois iours qu'elle y a demeuré, ou priant la bien heureuse Mere de nostre Seigneur, de vouloir interceder pour elle enuers nostre Dieu, pour la deliurance de sa maladie, restitution de sa santé: & en cette bonne, & heureuse recherche elle a par effect receu misericordieusement de nostre Dieu par l'intercession de la bien-heureuse Vierge, pliene & entiere guerison de sa maladie & perclusiō. Ce qui a esté au veu, & sceu d'un chacun, qui la veue sur les lieux a son arriuee, & des premiers iours ne se pouuant porter, & trainer, qu'avec grande, & extreme peine, & douleur sur deux bequilles, & peu apres l'ont veue aller & venir plainement, & librement, sur ses iambes sans l'aide de ses bequilles: lesquelles elle a par effect laissées sur les lieux, & est reuenue cōme elle est maintenāt en pleine & entiere sāté arriuee du iour de lundy dernier 14. du present mois, environ l'heure de deux heures apres midy, va & vient à present en tous lieux, à toutes ses affaires libremēt, tout ainsi que si elle n'auoit oncques eu aucune maladie, & ne sēt plus maintenāt aucune moindre partie de son infirmité & maladie, A ce

present ledit Marc Mandran pere, Estienne Lasseray beau pere, venerable & discrete personne Messire Nicolas Mascot, Prestre Curé de ladicte Eglise S. Catherine, Messieurs Jean du Bois, Noël Cheualier, & Nicolas Salles, Prestres Vicaires & habituez en ladicte Eglise S. Catherine. Hugues Henry Apotiquaire, Thomas Philippes, Lieutenant des Chirurgiens à Orleans, Claude Mau-poinct marchand droguiste, Fiacre Michonneau, Gilles Thisonneau, Charles Desmé, marchands drappiers: Aurelian Texier, & Jean Vincent maître tailleur, tous voisins, Estienne Dagis serui-teur demeurât en ladite maison, lesquels ont aussi certifié, & asseuré pour verité auoir tousiours veu depuis dix-huict ou vingt mois en ça ladite femme de Lasseray infirmé, malade, & percluse, & ne se portant qu'avec extreme peine sur deux bequilles, sans sortir de sa maison, sinon à quelques Dimanches elle s'efforçoit de se porter & rtainer à l'Eglise sainte Catherine leur parroisse, & pour ouyr la Messe, ce qu'elle faisoit avec grande peine & douleur, & maintenant la voyent & recognoissent entierement deliurée & guerie de ceste infirmité & perclusion qui est vne tres-grande & singuliere grace qu'elle a receuë de nostre DIEU. DONT & de ce que dict est a esté par moy Notaire faict, & octroyé le present acte & deliuré ausdicts Lasseray, & sa femme ce requerâs és presences de Michel le Mahis, & Roland mesnager Clers tesmoins. Ainsi signiez, I. Lasseray, François Mandran, N. Mascot Curé de ladite Eglise S. Catherine, du Bois, N. Cheualier, N. Salles Vicaire dudict lieu, E. Lasseray, F. Michonneau, Marc Mandran, Henry Apoticaire, Mau-



point, G. Thefonneau, Dismé Philippes Lieutenant des Chirurgiens à Orleans. Iean Vincent, Aurelian Texier, Estienne Dagis seruiteur dudit Lasseray : Mesnager, Demahis, & L'Asne, Noirairè à Orleãs. La minute duquel certificat si dessus transcrite. Auons ordonné demeurer attachée à la minute des presentes, pour y auoir recours quand besoing sera. **D O N N E'** audit Saumur par deuant nous Seneschal susdict ledit iour & an que dessus, Ainsi Signez I. Bonneau, & Chauffour Prestre de l'Oratoire, & I. Vignier cōmis Greffier.

